

69461

10260-109

39

10260-108

續輯咸甯縣志

鐵甯縣志

卷之六
五
秀茂

續輯邑志序

奎旣窮且老濩落無所用栖遲望雲山莊不與人世事
 久矣歲壬午邑續輯志乘齒及於余余不文奚能爲役
 而諸君子見委之意則殷甚也請於彼園陳侯侯遞延
 午峯余子蘭室章子同司載筆弗獲固辭因思方志之
 書風教係焉苟有可盡之心力不得謂無責於其身倘
 朝廷之政教弗紀賢司牧治行弗傳鄉先正勲業文章弗
 耀忠臣孝子貞烈義婦之卓行苦節弗彰是邑之陋亦
 士大夫之略也豈特山川景物韻事芳蹤黯沒銷沉爲
 可流連而嗟嘆哉余是以勉而承之頃志告成矣諸君

咸甯縣志

卷首

續輯邑志序

三

子又謂余宜有言以揭諸簡端則謹爲之序曰前事之
 不亡後事之師也咸割江蒲置邑宋元無志志自明天
 順學博伍公始是歲亦壬午也鄉先達孟公五岑繼修
 之逮國朝耐菴王公又哀輯之近愚溪陳君復據王
 志爲藍本編次成書今惟孟志亡耳餘皆具在余何庸
 贊一詞然攷成都古華陽國志趙清獻剛修爲集記矣
 王恭簡公復輯續記范石湖胡長文相繼撰丙丁二記
 一書經數人之手往往然也爰竭一得之愚立體裁具
 徵啓發凡舉例博訪周諮取前志之存者互相參訂考
 之通志郡志以決所疑旁稽江蒲志以證同異善者因

之訛者校之繁者芟之脫遺者補之失次者序之事以類分例以義立類例之端各著臆說蕭規曹隨十九多沿前志若知之有未至編之有未及者自知不免也其有待於後之君子乎余滋愧矣余行自念也在昔太史公作史記而唐司馬貞探撫異聞爲索隱歐陽修著新唐書而吳縝又撰糾繆外如吳仁傑之兩漢刊誤補遺陶宗之五代補錄皆以正原書之失而人推其有功於作者余何人斯敢希往哲但自秉筆以來實事求是校讐繕寫亦身任之年已七十矣日不暇給率夜漏下四十刻一燈炯炯慘淡經營雖乏史家之長而得失審寸

咸甯縣志

卷首

續輯邑志序

四

心惟恐有負委任區區之衷竊願與諸君子共質之惜午峯事未及半司鐸沔南暮雲春樹未得樽酒細論遺舛之咎其得而辭諸則亦聽其罪我與知我而已少白錢光奎序

續輯邑志序

志者史家之支流也自班孟堅漢書有志陳承祚遂名三國全史志與地者三輔黃圖爲志畿輔之始元和郡縣志爲一統志之始吳郡圖經爲郡志之始鄴錄爲邑志之始自是州邑皆各有志統疆域建置田賦學校官師人物藝文之屬覩縷縷續用備郡志通志一統志裁擇而太史氏亦得所依據以爲討論之資甚盛典也自來稱述卓卓者郡推姑蘇邑推武功王康二公本良史才宜其所作雄視百代矣然王志當時卽有訾議康亦

咸甯縣志

卷首

續輯咸志敘

五

見譏後世志豈易言作哉夫人非博通今古具知人論世之識未許以廁著作之林否則率爾操觚而欲秩紀繆而免嘲訕難已咸立縣始南唐保大歷宋元數百年紀載無徵明天順時學博伍君始創爲之繼以萬歷孟公國朝康熙時王公同治時陳公成書具在惟孟忠定所纂徧摻無得今去丙寅才十有七年疑若可以已者恭逢督撫各大憲編纂通志檄咸采訪邑尊陳公筱園以屬不佞不佞忝邑人士謀焉僉曰丙寅志視前此備矣顧訛漏亦所時有不及此釐正沿襲益久補救奚

從爰踴躍籌資推錢子少白董其事不佞與焉章子蘭
室董子雨三先後載槩鉛以從夫咸縱橫不及百里截
江蒲東西偏而邑之南唐逮今千餘歲矣伍孟諸公歷
加纂輯尙待撥拾不佞雖苦心摻訪而地處窮僻家少
藏書先民事實挂漏詎免矧兼資采訪者固多實事求
是而從不加意與瞻徇世故亦豈必無惟將無作有以
僞亂真不佞確有見聞則不敢以阿所好編次未就忽
奉司鐸沔陽之報不獲及躬告成是用耿耿然千慮一
得竊欲獻封菲以曉方來而荒疏陋劣尤望後君子匡

咸甯縣志

卷首

續輯咸志敘

六

所不逮則非徒不佞之幸也已

邑人余益杞午峯氏謹撰

續志敘

邑舉人章列侯蘭室

自丙寅至今壬午纔十有七年耳志胡以續曰上臺之檄催嚴也前志所未及者當補入也夫咸雖小邑而實四通八達之區山川形勝人物奇特仙釋隱逸才媛貞女節烈婦之表著城池郵舍戶口賦役之繁重古蹟市鎮陂塘寺觀土產之眾多人傑地靈指不勝屈見諸紀載者不綦可考哉然自唐宋以迄元明兵火頻仍邑志難云全備明時學博伍公輯之於前邑令王公元炳邑紳少司農孟公義甫至國朝康熙間何毅菴大令與邑紳王耐菴前輩兩續於後亦云善矣但年湮世遠

咸甯縣志

卷

敘

七

考証難週卽藏書家所存字迹亦多漫漶兼以蠹蝕鼠傷簡斷編殘令人悵悵同治丙寅邑紳陳愚溪廣文張介農別駕業重加纂訂付剞劂以垂後歲壬午上臺復修省志檄咸再輯邑乘邑侯陳筱園夫子已延余午峯孝廉錢少白明經理其事後以侯自天邑岳江書院歸適賦閒居促侯共理遂不獲辭而載筆從事竊以邑之有志也猶國之有史也史與志事同而實異史有褒貶志第錄其事蹟可爲勸導者彰明之而劣迹遺行采訪者不登諸手冊纂輯者亦無事搜求此其所以異也然而其事有甚難焉者節孝生人所重取之寬則易

濫繩之過則近刻非質乎人心之所同然折衷諸義理之至當未易云善由是以思修志之難也不難於考覈之精而難於斟酌之善不難於發微闡幽而難於循名核實有一事之未妥則於心不安有一語之未安則於眾不協卽譽之不以爲是笑之不以爲非矣而風化所關前無以昭彰往哲後無以感發來者則亦安用秉筆爲敘而不泛簡而能該此其所以難也昔曾子固有言知信乎古而不知合乎世知志乎道而不知同乎俗今茲志之修其信乎古耶其合乎世耶其志乎道同乎俗耶是難逃有識者之鑒矣志成聊附數語於簡端而共

明萬曆乙巳志序

孟養浩 邑人

咸故無志天順間博士伍君嘗屬草焉今百五十年矣磨滅漫漶不復可識薦紳先生難言之萬曆甲辰關中王侯來蒞咸甫下車卽詢邑志慨文獻之無徵毅然身肩其任而以載筆屬予予最款啓乏三長不嫻於史顧以邑人習邑事義不得辭也乃稍檢舊志參之楚史證以老更所誦說彙爲六卷各千萬言夫志郡邑之史也史以綜天下之故而志以撫一隅之實皇華遣使周爰咨度太師陳詩觀采風謠太史奏而記之以存往蹟鏡方來陳得失之林昭懲勸之公志尤史之權輿胡可廢

咸甯縣志

舊序卷首

萬曆乙巳序

九

也咸地褊小才當于男三之一又其建最後唐宋而上無聞焉孔子不云乎吾猶及史之闕文也夫信信信也疑疑亦信也吾徵其信者而闕其疑焉故於宋元而略也吾不敢誣也於明而獨詳也吾不敢佚也是故仰瞻天度俯察地宜形著於下象見於上精禋相摩氣類相召天人之際如鼓答桴無不應也熊繹受封于紅胙鄂罷侯置守分領併隸爲鎮爲縣詘伸代謝譬之置棋不常所治我是以有星野方域之表山厚象仁川虛象智灝氣盤鬱烟光浩渺地紀人文其致一也王公設險與民守之乘輿濟人君子譏焉向明出治非壯麗無以示

威興賢育才度庠周雍不見異物而遷斯爲士矣我是以有山川城池津梁公署學校之籍厥土塗泥火耕水耨皆庶倫生民鮮積聚承流之使冠蓋相望置郵如綫疲於奔命我是以有田賦郵傳之紀法施於民以死勤事非此族也不在祀典聖哲之變仙釋間出緇衣黃冠其麗不億青牛白馬之談猶河漢而無極也我是以有壇祠之錄豈弟君子德音不遐召棠故址峴淚堪揮高山仰止典型猶存我思古人雖百世之上悛然如將見之矧生同其地者乎我是以有宦蹟名賢之傳惟鄉三物論定後官匹夫有善可得而舉也里選旣湮科貢斯

咸甯縣志

舊序卷首

萬曆乙巳序

闢射覆爭奇得雄者王士生斯世卽莘巖有側注進耳我是以有仕籍之考江漢化行莫不靜好柔嘉維則聖善之儀雖元堂旣闕而彤管猶芬我是以有淑媛之述在則人亡則書識大識小惟愛則傳媚竈諛墓之詞不足存也我是以有藝文之輯孔子有言吾志在春秋彼隱桓之際則章定哀則微爲其有所刺譏也夫褒諱挹損之文吾何敢知要以抉其幽微正其譌舛芟其繁蕪增益其所未備闡前詰之清徽俟後人之可信則知我罪我有斯志在矣夫王侯蒞咸未闔月嚴保甲清積蠹諸善政且次第畢舉余拭目俟之而茲獨先其大者是

可以觀志云

明萬曆乙巳志序

趙邦柱邑

聞之墨子曰吾觀百國春秋蓋國不乏史云自秦罷侯
置守令而郡邑之志與家國二史並垂國史善誣家乘
善溢夫其經緯天地原本山川苞孕民物恩者不得譽
而怨者無所修其都則郡邑之志憂憂乎難矣今言史
者徧宇內十室之邑靡不緇裘爛焉而吾咸獨否天順
間學博臨川伍君嘗劔爲之稱具草耳旋亦就剝蝕不
復可句學士大夫橫經而闕八紘問以邑事莫置對也
往予爲吾友義甫言古人尙友先自其鄉杞宋之事孔

咸甯縣志

舊序卷首

萬曆乙巳序

上

子慨焉若任邑乘闕如何以令天下後世知有咸也義
甫笑弗答居久之關中王侯進諸生知邑志湮佚狀爰
謁義甫請焉義甫唯唯乃檢舊志什一益以耳目所覩
記彙爲六卷踰月而告成事於是王侯殺青走使白下
而屬敍於予予蹶然起曰吾志也而大夫成之耶居今
之世志古之道所以自鏡也咸地褊小割江蒲東西偏
而邑之蒞之以令尉董之以師儒一邑之山川民物天
喬嶮動恠瑋之態具焉觀政則餘澤猶芬考德則高山
在望熒行微言星列滿目迹其遺事想見其爲人無乃
備然而有企心而仰止思齊以庶幾昔人於今日則是

編之大有造於咸也昔王仲宣記英雄欲以其時重於古荆楚傳先賢欲以其地重於天下春秋云邁陵陸已遷而二書之存猶若琬琰其色而傳之響子桓氏云文章不朽誠非虛也矧一邑鉅典千秋鴻業賢師帥實執牛耳而鄉之名卿偉人奉槩孟從之組繡其舌金石其指以圖爲人紀明章天化爲萬世規有不美愛可傳流麻千禩者乎不佞浮沈郎署匏繫白門末由搦管從義甫後效千慮之一覩是編怦怦然心動焉夫自是而咸之人知有其鄉與天下後世之知有咸也則是編在矣王侯諱元炳陝之蒲城人義甫諱養浩邑人

咸甯縣志

舊序卷首

萬曆乙巳序

十二

康熙乙巳志序

知縣 何廷韜

居今而卓然具千古之識能斷然衡千古之事者誠賴有文獻之傳也文獻傳而故典備故典備而一代之史彰矣史雖

國書而其成必資郡邑之志以邑統於郡郡統於省省統於京師故大一統

聖天子車書全盛之模而守庶邦者牧伯師尹宣化中外之職也自郡而下凡在屬邑志可不詳具歟然邑志之作必參以野史方言之紀載故老隱碩之傳聞徵信也信則公公則信今而可以傳後甲辰秋九月韜奉

命任咸事方兢兢飲冰茹蘖修政和民甫及暮而邑中之
庶務修百廢舉農樂其田疇士澤以詩書得持其以咸
治咸者上報

聖天子固宰職然也退食之暇取往志讀之宋元以來有傳
人因有傳享惟明萬厯乙巳而後暨我重熙累洽之世
六十餘年之事蹟略焉未著夫咸雖小邑其間山川之
輿形士民之禮教人官物曲之輔相戶口田賦之生聚
而輻輳守土者本實心以行實政則一邑之志胡可不
博稽纂輯耶適 上臺飭續三楚全志徵書於咸爰進
邑薦紳及諸弟子員互相參校錄一事必錄其事之信

咸甯縣志

舊序卷首

康熙乙巳序

十三

而無疑甄一人必甄其人之名而當實當因者因之非
以蹈沿徇舊跡也未備者備之非以增飾炫新華也閱
三旬而成編登之梨棗用是達之 上臺獻之彤廷樂
觀館閣之編撰以成

國朝一統之史乘前以鑒往後以彰來無徒曰一邑之書也
爾猶得俟諸有識者訂千古之同心焉

康熙乙巳志序

訓導胡珏

余栖遲咸學宮星霜飽歷庶楹之下山川風土相習而
深學數武面相山則執政當世故墟也遠挹鐘臺則北
海書室在焉唐宋名公卿赫赫照耳目而元明兩代忠

孝偉望猶其近觀懷古時衡未嘗不深幸夫邑志之詳而可攷也春秋百國各有書蕭何入關盡收圖籍丙吉東曹考業邊瑱由此觀之古人致治圖籍之功斷未容泯志可昔有而今無與夫咸當江浦地未割一鎮也保大間始立爲縣宋元志不傳前明天順時學博伍君實始編輯司農孟公復續編於萬曆乙巳首尾百年賢有司得以居今知昔斟酌物產裁制壤則相風土順天時志所由重也兵燹散佚畱心者鮮余方愧才不逮伍君第願執鞭弭以俟君子之至斯也蓋六年於茲歲甲辰關東何侯奉

咸甯縣志

舊序卷首

康熙乙巳序

十四

簡書臨咸其明年慨然首商邑志徵邑髦士刻期續編積三月志成詳於前乙巳同於昔之伍君而相成此不朽者甚盛典也予坐臥廡楹日支頤相山博綜於唐宋元明之間俯仰於車書一統人文物產之麗庶無負此星霜云耳例有序余不敏願僭以書諸左

康熙乙巳志序

鄭邦相邑人

天文有分野地輿有疆域封建之制變爲郡縣其間或百里或數百里阻山距河語言物類懸殊不一豈非天地有自然之排設而隨時因革人特爲之輔相裁成者與山川之氣民物生焉有樸有僞有良有悍而土之肥

瘠俗之善淫靡不隨氣化以相感非有廉明之吏與端
謹之士夫以倡明教化維持風習則樸者良者皆不可
恃以爲理而况望其有忠孝節義之士孕育而起者乎
此人之所以與天地參也邑有人而邑治猶之國有人
而國治天下有人而天下治也賢人者眾人之則也前
人者後人之師也文獻不足邑典闕如其何以矩矱百
世聞風興起也與此志之不可已也咸志始於天順間
學博臨川伍君翔之繼萬厯年間 邑侯諱元炳王公
領之而先達鄉先生養浩孟公纂輯成卷余生晚不得
覲其人復不得稽其籍滅沒數十年縱父老傳聞疑信

咸甯縣志

舊序卷首

康熙乙巳序

十五

相半其間士之仁者大夫之賢者愚夫愚婦之節烈名
儒碩彥之理學才臣傑士之忠義勳名間不乏人而竟
無傳焉主持風教誰之責與咸之民樸魯而耕耨故兵
凶不至於走險咸之士散謹而詩書故矜肘不及於城
闕咸之宦溫儉而鮮驕侈故科名間作不敢爲墨吏所
由然者星川之氣鍾之者和受之者正而又有良牧休
養甄育於其間風純俗美殆斯人之力也甚矣志之不
可已也美而弗彰孰爲之前盛而弗傳孰爲之後故千
百年之聖踪賢跡四海九州之名山大川搜之輿圖燦
若列星而况在戶牖里巷之間乎邑之有志以彰前也

以訓後也以示凡爲吏者不可不聚生齒而慎賦役而
凡爲世祿者不可不尙忠孝而羞淫侈也此修志之義
也余有意未逮卽授郡令仕優則學竊自勉焉乃吾弟
走書饒陽盛稱邑侯何公新任廉明而惠邑人感之以
修輯咸志請序將不以簿書吏視予也而曷敢辭焉若
夫著述之詳略是非之眞贋三代遺直父老存焉去淫
就實討古論今立不朽之言昭垂典則所望諸君子敬
敏以勦厥成矣

咸甯縣志

舊序卷首

康熙乙巳序

六

康熙乙巳志序

鄭之謙邑人

洪濛旣闢清甯位分岳瀆之精上應列宿星野之區下
配八極條理燦著邃古而然矣載籍以來九州形制詳
於禹貢十五國風備於魯詩繼此而方輿山海之經三
都兩京之作人物風土之記紛然雜出故以域中之大
赤縣神州而廣凡名山大川之阻距古聖前賢之出處
珠璣百寶之興藏草木禽魚之方產靡不展卷燦然若
揭日月而行中天矧閭里之近肩睫之間故典不彰文
獻莫考往者湮滅來者無傳豈非士夫之責也耶甚矣
邑不可一日無志也何也一邑之志一邑之史也山川

之美惡必書風俗之貞淫必書民情之悍樸必書戶口
物產之繁簡必書忠孝廉節之行實必書名賢羽仙之
遺蹟必書故蹟志可以觀風觀風可以知樂知樂可以
察禮察禮可以考政於以寓勸懲而移風易俗在此也
志所係豈微哉咸志始於宋元明天順中取而輯之者
學博伍君福也萬歷中詳而編之者前邑侯元炳王公
鄉先遠養浩孟公也煨燼之餘廢缺無存三紀以來目
不覩是書矣邑侯何公毅菴於治咸之明年遍采民間
始得殘編命邑中諸君子纂輯成書余適以省覲來歸
問敘於余余備員史館方學楊子雲日懷鉛提槧向使
者問外國事况先輩芳型景仰在望所樂觀也麗藻遺
文所樂讀也幽貞逸節所樂道而闡揚也附名不朽復
何辭焉夫後之視今亦猶今之視昔若覽是志者知所
興起教行而俗美士端而民純山川毓秀人文踵作使
志不以地重而以人重則李北海之高標馮文簡之芳
模如邑乘所紀者庶乎其不墜云

康熙乙巳志序

王禹錫邑人

郡應垣也邑百里專城應宿也邑長令北宅南向坐奉
君令以臨民也君應極日東出躔十有二皇建而人民
會歸於極長令上應列宿一邑休徵戾氣罔不係於身

咸甯縣志

舊序卷首

康熙乙巳序

十七